

# Pilipo Leta

## Polimna İriki Pilipo Sosim pilwa

### Leta

### Isipkita Yitkak

Onggityam Pilipo Leta irika riga re Polte. Onggit win nat ton yirikonj, re ton sibibmetind yiibnenenonj Roma taunind, ama rika A.D. siksti (60) kemag nat.

Pilipo sosit Polim yyiyag wurar gasa yitmikurauto Epaproditom pilind de Roma taun wa. Si re Epaproditon Roma wa yiibnonj Pol kima, ngirpu ket tin juwarit yokatonj. Si onggit mopip Pilipo sosit ma sobijog na Epaproditond gar bebig ke yokatonj. Ajî re ket ton b'ogil awonj, Pol kwa ket tin yitmikitonj Pilipo sosim pilwa onggit leta kima. I Pol Pilipo sosim pilwa pitapita yomneny onggit letand re tina danda kima towanîm singi b'iyena mile gatab dide tina gar sam gatab ringmana re Pilipo sosit Polind yirmekonj singi b'iyena mile ke dide yim b'akawa mile ke. Nangga ma ji da Pol sibibmet kena itemb leta yirikonj, aji itemb re ji leta ma sobijog sam ke yindangir omni e yiibim.

I Pol kwa gar ke utkunda riga nonony amniny da, “God yyiyag wurar wa akainonj i ingkenaemb win gar ke utkunda yoramitonda Godim pilind yirkokar okatam. I idenatemb win Yesum pilind aukitondam. Aji ma Mosemna gog yit yimta undoka kena win yirkokar yokatonda.”

I Pol kwa yisipkeny sam dide ngimbla gatab rinte re God towa agoniny yepim re Yesu kima

yipand wekeny.

### *Simesime Yitkak*

<sup>1</sup> Simesime! Keriso Yesu ma wiko riga, Kon Pol dide Timote, sin itemb leta yirikya re komresa yina riga wa pilwa e yepim re Keriso Yesum pilind gar ke utkunda aramkanj opi re Pilipo eriyand wekeny, i yipand ton kima elda dide diyakona.

<sup>2</sup> Mera b'u Godim pilke dide Yonggyam Yesu Kerisom pilke wurar dide ngimbla win kima!

### *Siteket Yit dide Yir Opmita*

<sup>3</sup> Kon siteket yit kor Godind yomnenenyin, mop nokip kon ita winind wen nony eyeneninyin.

<sup>4</sup> Si koina ita yir opmita winind kon ukoi sam kima e wa gatab yir opmitena yomnikenenyin.

<sup>5</sup> Kon siteket yit Godind yomnenenyin dide sam kima yir opmitenenenyin, mop nokip win kor pilwa yim b'akawa yoramitenenya God ma b'ogil yirkokar bage yit warabag omnikam otomapu ke rina re win God ma b'ogil yirkokar bage yit yokatonda ngirpu yu.

<sup>6</sup> I God kea wa wingirind b'ogil wiko yotobarkonj. Si kon kupkakupka iminjog ke wumir yokasin da God itemb b'ogil wiko omnika yiyyen dide Ton ita itemb wiko undwas dem ngirpu ra Yesu Kerisomna itendapu bibir ik dem.

<sup>7</sup> Si itemb re iminjog dimdim e kornim odede wip b'ipindenam komresa wa gatab. Mop nokip kon wen awaminyin koina gar nasim, i kwa onggit winind ite re kon sibibmetind nibnyin, kon God ma b'ogil yirkokar bage yit e negir yitkakim pilke yiwaendenyenin dide pita yomnenyenin da, itemb God

ma b'ogil yirkokar bage yit re iminjog e. Si win komkesa ita yim nokaenena onggit wikom rina re God wurar kima nokawonj omnikam.

<sup>8</sup> I kon komkesa wen ukoi jog im singi eyeninyin odede ringma re Keriso Yesu singi yoramiteny wa pilind. Si God re kornim yir ungata riga e onggit gatab.

<sup>9</sup> I kon ija emb wanim yir opmitenenyin odede da waina singi b'iyena mile iminjog b'utusmurenanj dide warabag taukanj iminjog God ma yit wumir okatena kima dide komkesa wimena wingirind b'obogil ongwatena kima.

<sup>10</sup> Nokim da idenat win b'obogil tangwatenindam nangga im re iminjog b'ogil mile, dide ingkaimemb win Godim wipind kilkesa dide b'injawa kesa taindam dem Kerisomna itenda bibirind.

<sup>11</sup> I kon kwa yir opmitenenyin da win Yesu Kerisomna danda kaim negir kesa dimdimjog mile jogjog omnika teyenindam, i ingkaimemb win negir kesa dimdimjog milemlna kip ke yindangir taukindam. Nokim da idenat rigap Godind b'ogil inyomarena okaenenyi dide esourenenyi.

### *Pol ma Wiko gatab Bage Yit*

<sup>12</sup> Gar ke utkunda nany dide yingganwar! Kon kwa singi en da win wumir taindam da itemb gasa rina re kor pilind aukonj, tonit wang yiyonj God ma b'ogil yirkokar bage yit iminjog ukoi warabag omnikam.

<sup>13</sup> Si ingkaemb ji komkesa Roma taun yir ipka geja riga bobo dide komkesa onggit taun rigap pitand wumir yokatenyi da kon sibibmet nate

nibnenenyin, mop nokip kon Kerisond pita yomnenenyin.

**14** I dide kwa gar ke utkunda nany dide yingganwar wingirind jogjog riga koina sibibmetind wi'mena gatab utkundenyi. Si ingkaemb ton kupkakupka iminjog ke wumir yokatenyi Yonggyamim pilind, i ton ukoi jog danda yokatenyi towaina garind dide moga kesa God ma b'ogil yirkokar bage yit ukoi kana pita wa yomnenenyi.

**15** I itemb re iminjog e, towa wingirind ninda rigap Kerisond pitapita yomnenenyi, nokip ton ita ken nonyik niponenenyi dide ken yit nipatenenyi. Aji kwa ninda rigap Kerisond pitapita yomnenenyi, nokip ton ita b'ogil nony menamena ke singi yoramitenyi kor pilind.

**16-17** Si onggit naskanyam rigap singi aukenenanj odede nony menamena kaim da ton towalenggyam b'urowatena mile ke ken gou wa notinyi, i ton nony menamena amnikenanj da idenat kor bebig kwa b'usaya oikindena nitiyenauranj koina sibibmetind wi'mena wingirind. Si ton re ma iminjog nony menamena kae Kerisond pitapita yomnenenyi. Aji daka onggit ninda yimtanyam rigap re ken ita singi niyenenyi, mop nokip ton wumir yokatenyi da Godit ken noramitonj tina b'ogil yirkokar bage yit owaendenam negir yitkakim pilke. Si ton odede singi iyena kaemb Kerisond pitapita yomnenenyi.

**18** Si makwa ita yipa negir! Makwa ringma, rada ton Kerisond pitapita yomnenenyi negir nony menamena kae ominda iminjog b'ogil nony menamena kae, si ton opima Kerisom gatab God ma

b'ogil yirkokar bage yit ukoi warabag omnika yiyyenyi. Si onggit paemb kon ukoi sam e aukenenyin, i dide kon kwa iminjog ukoi sam e omnika yiyyenyin.

**19** Mop nokip kon wumir en da, itemb koina sibibmetind wimena ismate ken wang nitiyen wingawinga nya ke b'itraram koina sibibmetind wimena wingirind, nokip win opima kor gatab yir opmitenenindam, i kwa Yesu Keriso ma wingawingate ken irmeka niyeny dide yim okaena niyeny.

**20** I kwa kon koina ngorjog singi dide warim b'ogil isma okata ma iminjog singi aukenenyin, si ingkaemb kon iminjog ke yokatenyin da makwa ita yipa gatab ke kon ingar taen. Aji yu kon mogesa e yingaenyin koina ji komresa wimena wingirind. Nokim da idenat kon Keriso nena esourenenyin odede yipa wip rija e re kon esourena yiyyenyin, nangga ma ji kon yilo nitibnyin o minda uj okasin.

**21** Mop nokip rada kon yilo e nibnyin, kon Keriso nena e yewangaenenyin dide Kerisom gatab God ma bage yit e yiyyenyin, i rada kon uj okasin, itemb kornim okatam re b'ogiljog isma e.

**22** Aji ra koina ji ke yilo wimenat b'ogil kip kima wiko tamnikiny Kerisom pilind, si kon ma wumir en nangga e kon okasin, yilo o uj.

**23** Si iminjog onggit nimog gasasi ken nemorkya. Aji kon ukoi jog singi e yokatenyin da kon gowukoi iraren dide Keriso kima nitibnyin. Mop nokip itemb re iminjog jog ukoi jog b'ogil emb ji kornim.

**24** Aji ra kon ji ke yilo nitibnyin wen yim okaenam, itemb re wanim iminjog ukoi jog gasa e.

**25** I dide kon kupkakupka iminjog ke wumir yokatenyin itemb koina yilo wiwema gatab da, kon yilo nitibnyin dide iminjog kon kwa komesa win kima nitibnyin, nokim da idenat kon wen yim takaeninyin waina gar ke utkunda b'ogil danda dide sam okawam.

**26** Nokim da ra kon b'usaya netken dem wa pilwa, si idenat waina b'asourena ukoi warabag taukanj dem kor map Yesu Kerisond yiimta undoka wingirind.

### *B'ogil Danda kima Onyitam Wingawinga Gejam*

**27** Si win b'ogla walenggyam Kerisom gatab God ma b'ogil yirkokar bage yit ririrind b'ogil mile kima wiwema tuwenyit. Nokim da nangga ma ji rada kon ita neken wa pilwa dide wen yir tanginyin o rada kon wa pilke ewaikiti e nibnyin, si idenat kon b'ogla wa gatab tutkundenyin odede da win kor kesa ke danda kima im yipand wingawinga ke owinkwi wekenyit, i dide da win yipaina nony menamena kima im b'ajobrena wuwenyit God ma b'ogil yirkokar bage yit b'obogil gar ke utkunda ke okatenam,

**28** i dide kwa da win makwa opima mogaa inindam towanim yepim re wen geja eyenanj. Onggityam waina danda kima onyita mile re waina geja riga wa pilind negir omnam imjata mal e, aji daka wanim re dadal yirkokar okatam mal e. Si itemb gasa re Godim pilkae.

**29** Mop nokip re God wa b'ogil wurar ogona eyeninonj Kerisom wiwo omnikam, si itemb re ma Tin gar ke utkunda nena okata mana, aji kwa Tina wiwo map b'idgotnena okata mana.

**30** Si wida insima yipa wip b'idgotnena akatenindam kon re dide. Si win kea onggityam koina b'idgotnena yir angenentondam koina wimena wingirind, dide kwa yu win opima utkundenindam kor pilke.

## 2

### *Keriso Yesu ma Tilenggyam Sobijog Awou Mile*

**1** Si onggit paemb rada ita nanggamog b'ugowa yit e yibim wa wingirind Keriso kima wimenand, i rada ita nanggamog danda b'agona yit e yibim wa wingirind Keriso ma singi b'iyena wingirind, i rada ita nanggamog e Yinayina Wingawinga ma yingg iyenam yibim wa wingirind, i kwa rada ita nanggamog e gar ke kear dide kear omnena yibim wa wingirind,

**2** si win ken ukoi sam ke yindangir omnika odede nya ke da win b'ogla yipaina gasand nony menamena tamnikindam. Si onggit nony menamena omnikam win yipaina singi kima taindam, i wingawinga ke yipand taindam dide yipaina nena nony menamena tamnikindam.

**3** I goro kwa yipa odede mile omnika, it re da riga gou wa omnena win walenggyam b'urowatenindam. I goro kwa yipa b'asourena mile omnika waina wiiko omnika gatab. Ajie walenggyam gou wa nonyik b'amdena kima win walenggyam walenggyam nony ke b'atgenaindam odede da, "Ton re pumb wa im, ajie kon re gou wa en."

**4** I dide kwa win yipayipa riga goro wainajog gasa b'ogil omnika nenamb nonyik

b'atimdenindam, aji b'ogla kwa ninda b'enga rigaina gasa.

<sup>5</sup> Si waina yipayipa garind nony menamena tamnikindam onggit yipaina gasam pilind odede it re rija e re Keriso Yesu moina garind yibim.

<sup>6</sup> Keriso Yesu yibnonj re God kima yipa ririrkip get ke kukip na,

aji Ton maka Tilenggyam Tina b'ogil okati itemb God kima yipa ririrkip get ke kukip b'agenayonj da itemb re God kima yipa ririr e.

<sup>7</sup> Aji Ton Tilenggyam itemb Tinajog kukip kea b'eomnenonj

odede nya kenaemb da Ton Godimna wiko rigajog kukip na yokatonj

dide Ton yipa wip rigaina ji ke pita awonj.

I rigap Tina gim ke wip yongwateno odede na da, "Ton re rigajog e."

<sup>8</sup> Ton Tilenggyam sobijog na awonj, i Ton Godimna yimta undoka riga awonj ngirpu Tina uj.

Si Ton odede bebig kima na wul b'agbagind uj awonj.

<sup>9</sup> Si onggit penaemb God Todaka Tin pumbjog wa yurowatonj,

i kwa Ti yokawonj onggityam nyi rinte re pumbjog wa yibim komkesa b'engabenga nyi wa pilke.

<sup>10</sup> Mop nokip komkesa riga

yepim re wekeny pumb tungg wa dide gowukoyind i dide gou borand,

ton b'ogla kumsos b'amka wowen Yesu ma nyiwim pilind,

11 i kwa b'ogla komkesa tugimip pitand rapureninem da,  
 “Yesu Keriso re Yonggyam e,  
 Abu Godim yakaenu b'ogil inyomarena.”

*Ngaya Inyomarena pila Wimenam Gowukoyind*

12 Kor rigawar yena re kon singi eyeninyin! Si onggit paemb win Godind yimta yundoka odede wip ringma re win ita winind tin yimta yundo-kenena. I ma odede win nena nat rina re kon nibnond win kima ajiyu kwa b'usaya kor kesa ke, wa wingirind dadal ngirpu kesa yirkokar okatam ukoi kana wiko tamnikendam Godim wipind mogaaena kima dide kaktiti aena kima.

13 Mop nokip God re wiko omnikāriga e waina garind. Ton Tina sam kima singi gasa amnikeniny odede nya ke da, Ton waina gar wa wiko omnikam singi aramiteniny dide kwa wiko omnikam danda agoniny.

14 I win komkesa gasa tamnikindam ra goro kwa yit kima dide yit b'ipatena kima.

15 Nokim da idenat win b'injawa kesa dide kilkesa taindam, i idenat God ma iminjog negir kesa b'iga taukindam riga wa wingirind yepim re yu onggit gowukoyind nonykok kaokao kima dide gar eskamki kima wekeny. Si onggit riga wa wingirind win wub kumbind iki pila im ngaya tanyorkindam onggit gowukoyind.

16 I kwa ra win yirkokar okatam God ma yitkak danda kima owama teyenindam, si ingkaimemb kon wa gatab b'asourena takateninyin dem Kerisomna itenda bibirind, i kwa koyna seo kima wiko wa wingirind re makwa ita kip kesa tainy dem, i

dide koina ukoi bebig kima wīko re kwa makwa ita  
kip kesa tainy dem.

<sup>17</sup> Aji ra koina bebig wīkot b'ogil tamnikiny  
waina gar ke utkunda milend rinsim re wīn  
Godind ewangayam wīko amnikindam Godim  
singi sī gasa oramita re dide, dide nangga ma jī  
rada kon kikitum koina yirkokar kus igmarken  
waina onggityam gar ke utkunda mile b'ogil om-  
nam, kon sam e taen dide kwa komkesa wīn kima  
yipand gilgil sam taen.

<sup>18</sup> Sī wīda kwa onggityam yipa wīp sam e okasya,  
ī dide kon kima yipand gilgil sam taenindam.

### *Timote dide Epaproditō*

<sup>19</sup> Ra Yonggyam Yesu singi tainy, kon singi en  
Timotend wanakana itmikisin wa pilwa, nokim da  
idenat koda kwa gar sam taen ra kon wa gatab  
wumir okasin.

<sup>20</sup> Sī kon tirir yomnond Timotend itmikitam wa  
pilwa, mop nokip kor Timote nenate nibnau yete  
re kon kima yipand gar ke nony kubir aeny wa  
gatab.

<sup>21</sup> Mop nokip komkesa rigap oraka eyenanj re  
towainajog gasa nena im, aji ma Yesu Kerisomna  
gasa im.

<sup>22</sup> Aji ke wīn wumir im Timote ma wīp owarkena  
danda rinsim re ton kon kima God ma b'ogil  
yirkokar bage yit warabag omnikam bebig kima  
wīko amnikeniny, odede wīp ringma ra yipa b'igat  
ti b'uim wīko omnikaeniny.

<sup>23</sup> Sī onggit paemb kon singi aenyin wanakana  
tin itmikitam wa pilwa. Ī ridenat ra kon yir ongen

nangga gasa na ra kor pilind tawik dem, odenja e kon tin itmikisin dem.

<sup>24</sup> Aji kon kupkakupka iminjog ke wumir yokasin Yonggyamimna singind da koda kolenggyam wanakana neken dem wa pilwa.

<sup>25</sup> Aji kon nony menamena amnikenenyin odede da kon b'ogla naska Epaproditond itmikisin wa pilwa. Ton re koina gar ke utkunda yingga e, i kon kima yipand gilgil wi komad e, i kwa kon kima yipand gilgil Godimna geja omnika riga e. Aji ton re kwa waina itmikiwi ko riga e yena re win yitmikitonda kornim yim okaenam.

<sup>26</sup> Si kon tirir yomnond da kon Epaproditond itmikisin wa pilwa, mop nokip ton ukoi singi e aeny wen komkesa yir ongongim. I kwa ton nony bebig kima e yibneneny, nokip ton wumir na da win kea utkundenonda da ton kopa na yibnonj.

<sup>27</sup> I iminjog ton ukoi kopa na yibnonj dide momtajog uj yokatonj. Aji God tin kear yomnonj, si ton ket b'ogil awonj. I onggit Godimna kearit ma tin nena na kear yomnonj, aji keda kwa kea kear nomnonj, nokim da idenat kon maka b'usaya gar kopa okatenyen koina gar kopa tumind.

<sup>28</sup> Si onggit penaemb kon ukoi jog singi ae nond tin itmikitam wa pilwa. Nokim da ra win tin kwa b'usaya yir ongya dem, idenat win ukoi sam taindam dem dide koina gar kopa toda kwa sobijog tainy dem.

<sup>29</sup> Si onggit paemb da win b'ogla Yesu ma nyi kima tin simesime omnenya dem ukoi jog sam kima dide tin ukoi kana isnaenya dem. I win b'ogla kwa odede wip riga tesnaenenindam odede yipa wip nya ke.

**30** Mop nokip ton tina yírkokar yisingkandenonj Keriso ma wíko omníkam, ngírpu ton momta uj yokatonj, nokip ton ma sobijog na waina omníki kesa wíko komb undwatam yím nokaenenonj.

### 3

#### *Goro İmínjogim Omnená Gim ke Mile gatab*

**1** Kor gar ke utkunda nany dide yíngganwar! Kon kikitum yítkak kwa nitindeniyin. Úkoi sam ainam, nokip wín Yonggyamímná ríga im. I ite re kon waním yipa ririrkip yítkak erikinyín, korním ma bebiç im, aji waním re negír omníka ke b'obogíl yír b'ipka mim ji.

**2** Yír kíma tekenyít onggít yongg pila kílkíl negír ríga gatab. I yír kíma tekenyít onggít negír mile omníka ríga gatab. I dide yír kíma tekenyít onggít negír nya ke jabajaba kípear ipka mile ríga gatab.

**3** Mop nokip ton re ma imínjog God ma obagendi tírir omni mal wugím ipki ríga im, aji menpim imínjog God ma obagendi tírir omni mal wugím ipki ríga yepim re men Yinayína Wingawinga ma danda ke Godínd yewangaenenu dide b'asourena yokatenenu Keriso Yesu kíma wímenand, i kwa yepim re men maka imínjog ke yímjatenyu gim ke rigaina kípearínd omníki mile.

**4** I kodaka rírir en imínjog ke imjateni ríl ogenkam onggít gim ke kípearínd omníki mile gatab. I yet ra nony menamena omník da, “Kor opima imínjog ke imjateni ríl nibnainy onggít gim ke kípearínd omníki mile gatab,” si tina onggít gatab ríl re ma imínjog im, aji koina re imínjog im.

**5** Si re kon ukendond dide eitim (8) bibir awond, kon ket God ma obagendi tirir omni mal wugim ipka mile yokatond, i kon Israel riga en, i kon Benyamin gu ke riga en, i kon iminjog Ibru Riga en, i dide Ju riga waina gog owama mile gatab ke re kon yipa Parisai riga na.

**6** Si kon ma sobijog na nonyik b'iponena mile yokatenond Kerisomna sosi gatab, si kon ukoijog bebig oramka eyeninond itemb sosi awir omnam. I kwa kon ma sobijog na negir kesa dimdimjog mile omnikam singi aukenenond gog yit ririrind, si odedep kon b'injawa kesa danda kima gog yit yimta undoka riga na nibnenenond.

**7** I opimemb komkesa yit re kornim b'ogiljog gasa na nibnainonj, aji re kon Kerisom iminjog wumir awond, si yu kon opimemb komkesa nony ke akateninyin da komkesa re kornim irarka mim.

**8** Ma onggit gatab nena na, aji kon kwa nony ke yokateninyin da komkesa gasa re kornim irarka mim, mop nokip kor Yonggyam Keriso Yesum wumir okatam re kornim ukoijog na awonj aji ninda gassa re ma ukoi na. Si itemb re Keriso Ti mapenaemb kon opimemb komkesa yit erarkinond dide ket yu nony ke akateninyin da komkesa re liya pila b'iskoka mim, nokim da idenat kon Kerisond okasin,

**9** dide kon kolenggyam pita taen da kon re kup-kakupka Kerisond gar ke utkunda riga en. Mop nokip kor negir kesa dimdimjog riga nyi okati re ma gog yit yimta undoka kae, aji Kerisond gar ke utkunda kae. Re God yir nongonj koina gar ke utkundand, si idenatemb God nokawonj negir kesa dimdimjog riga nyi.

<sup>10</sup> Si kon singi en Kerisom b'obogil wumir awowim, i tina utnyita danda okatam, i yipand ton kima tina b'idgotnena yingg okatam, i dide tina uj kima yipa wip uj okatam.

<sup>11</sup> Si ra ridede nya ke ririr ra, kon singi en itemb nya yimta undokam, nokim da idenat kon topenjin dem utnyitapu wa koina uj ke.

### *Koina Wingata Yimta Undokinam*

<sup>12</sup> Kon ma odede ma nindenjin da kon kea onggityam komkesa akasinond o kon kea ririrkipjog gar ke utkunda riga awond. Ají kon ita danda yondratenjin opimemb komkesa mira kornim okatam. Mop nokip Keriso Yesu ken tinim nokatonj re onggit omnika mana.

<sup>13</sup> Kor nany dide yingganwar! Kon kolenggyam maka odede nony ke aenyin da, “Kon kea onggityam komkesa amorkinyin.” Ají ita winind odede yipaina gasa nena e kon yomnikenenjin. Si kon kor kak ke gasa nony b'edateninyin, ají kon kor wip ke gasa okata ma kupka danda kima b'ikenenyin.

<sup>14</sup> Si kon ita winind odede kupka danda kima wip wa b'ikenenyin undwatapu mal wa okatam pumb tungg ma mira rina re ken God ara nemokonj Keriso Yesumna nyi kima.

<sup>15</sup> I men komkesa re rigajog im wingawinga ke. Si onggit paemb men b'ogla odede yipa wip milend nony menamena ramnikinum rigajog re dide. Ira win b'enga wip milend nony menamena tamnikindam, si God ita kwa onggit gatab wa pita tamnenainy.

**16** Si men b'ogla onggityam mile nena omnička reyeninum nanggamog im re men akatenindam.

**17** Gar ke utkunda nany dide yinggañwar! Win koina wingata yipand gilgil yimta undoka riga ainam! I dide win b'ogla yir ipka teyenindam opimemb riga yepim re ton yipaina wingata milend wekeny odede wip ringmana re win sowa pilke yokatonda.

**18** Si kon jogjogpyam naskand wen yit amneninond, aji kon kwa yu b'usaya nitinjin yirekip kima, mop nokip jogjog riga wekeny re Kerisomna wul b'agbag ma geja riga im.

**19** Si onggit riga waina undwatapu ra negirjog b'isagika im. I ton owou nena yir ngii riga im, si towaina god re towaina kom im. I dide kwa ton towaina b'ogil inyomarena kima gasa im asourenenanj, aji opimemb gasa re towanim ingar okatena mim. I kwa ton gowukoi gim ke gasa nena nasim nony menamena aramkenenanj.

**20** Aji men re pumb tungg riga nyi okati im wekenyin. Si men gar sam kima e yir ungaenenu mera Yonggyam Yesu Kerisond yet ra pumb tungg ke ik dem dide mera dadal ngirpu kesa yirkokar notgoniny dem.

**21** I Ton tina omnička danda yingaeny dide komkesa gasa eyeniny Tina yir ipka danda wira wa, i Tonsim onggit danda ke meraina goujog wa danda kesa ji tengenjiny dem, dide sisil danda kima ji tamnikiny dem Tina b'ogil inyomarena kima ji re dide.

### *Pol ma Kikitum Danda Yit*

<sup>1</sup> Kor gar ke utkunda nany dide yinggañwar yena re kon singi eyeninyin dide kon singi aenyin yir ongongim, i yepim re kornim sam im dide b'ogil esourenajog dira im! Si onggit paemb yena re kon singi eyeneninyin, win b'ogla danda kima onyisinam Yonggyamind gar ke utkundand odede ringmim re kon wen auyaeninyin.

<sup>2</sup> Yuodiya, kon yit itaya mitiyenyin, dide kwa Sintike, kon yit itaya mitiyenyin da win goro wetaweta tawa, aji win b'ogla yipaina gasa ne-nand gilgil nony menamena oramisya. Nokip win yipa nat Yonggyamind gar ke utkunda ke yokatonda, si ingkenaemb ket win gar ke utkunda ke wundoi awonda.

<sup>3</sup> I kon kwa iminjog kor wikomad, meda kwa yit itaya mitiyenyin da man yim takaeneninyit opimemb kongga yepim re God ma b'ogil yirkokar bage yit warabag omnikam kon kima yipand gilgil bebig kima wiko yiyo, i kwa Kleme dide ninda kon kima gilgil wikoyam. Si opima towaina nyi wekeny yirkokar peband rokasim re God yirkokar okati riga nyi oramka eyeniny.

<sup>4</sup> I ita winind win sam na taukenenindam Yonggyam kima yipand wimenand. I kon kwa b'usaya nitinjin da, "Win sam na taukenenindam."

<sup>5</sup> I waina musik isnawa nony kima milep komkesa riga wumir ramneninem! Si Yonggyamna itenda bibir ke momta e.

<sup>6</sup> I goro kwa yipa gasam pilind gar bebig taininam, aji win b'ogla komkesa waina b'igekena Godim pilind aramiteninam siteket yit kima yir opmita ke dide b'itena ke!

**7** Si Godimna ngimbla rinte re men rigap ma ririr im nony taukindam, tonsim waina gar dide waina nony menamena b'obogil yir ipka teyeniny Keriso Yesu kima gilgil wimenand.

**8** Gar ke utkunda nany dide yingganwar! Kon kikitum nitindeniyin. Win b'ogla odede milend nonyik b'amdena tuwenyit, opi re da nanggamog mile e re iminjog, i nanggamog mile e re b'ogil isnawa kima, i nanggamog mile e re negir kesa dimdimjog, i nanggamog mile e re yina b'amnena kima, i nanggamog mile e re singi b'iyena kima, i dide nanggamog mile e re esourena kima. Si kwa win b'ogla onggityam mile nena yir teyenindam ringgityam mile im ra otomantijog i kwa ringgityam gasa im ra b'ogil ewangaya kima.

**9** I win inaemb mile omni ka teyenindam rin re win kor pilke b'auyaenentondam, i akatenenton-dam, i utkundenentondam, i dide yir angenenton-dam. Si idenat ngimbla God win kima ibneneney.

### *Siteket Yit Pilipo Sosi ma Wurar gatab*

**10** I kon ukojjog sam e yokateniyin Yonggyam kima gilgil wimenand, mop nokip win kea b'usaya kwa sisil danda kima nony epangenjindam kornim yim okawam ninda nya ke. I win itemb kor gatab kea nony menamena omni ka eyentondam, aji wanim gangga awir na aukito ken odaram.

**11** Si kon nindeniyin re ma gasa kesa ma pae. Mop nokip kon kea b'auyaenenond ridede na kon ririrkip gasa akateninond b'ogil dide negir wingirind.

**12** I kon wumir en ridede e b'obogil wimena netkeniyin gasa kesa wingirind, i kon kwa wumir

en ridede e b'obogil wimena netkenyin jogjog gasa kima wingirind. Kon kemb b'auyaena nekenond wigawiga wimena nya rina re kon komesa gasa ririrkip amnikeninond komesa winind, minda rika jogjog owou kima wimenand o minda owoupa kima wimenand, i kwa minda rika jogjog gasa kima wimenand o minda gasa kesa wimenand.

<sup>13</sup> Kon ririr en komesa winind ririrkip wimenam, mop nokip Kerisote ken dandam nomnikeneny.

<sup>14</sup> Aji win kea b'obogil amniktondam opimemb mile rina re win kon kima yipand gilgil bebigjog yingg akatentondam.

<sup>15</sup> I win Pilipo Sosi riga, kemb iminjog wumir aindam odede da wa wingirind God ma b'ogil yirkokar bage yet otomapund ridenat re kon yiwaitond Makedoniya ke, makwa yipa sosit kon kima miramira gasa yingg b'agona mile yomnikonj, aji ina yipaina waina sosi nenat.

<sup>16</sup> I kwa re kon nibnond Tesalonika wa, win kea kor singi ingaena gasa nitmikurautondam yipapyam i dide kwa nimogim.

<sup>17</sup> I kon ma wurar gasa im oraka eyeninyin, aji kon oraka eyeninyin re wingawinga ke kip im jogjog warabag aukam wa pilind.

<sup>18</sup> I kon komesa gasa akasinond re yindangir na dide kwa jogjog im gasa yindangir nibnainy. Si kon nibnyin re jogjog gasa kima e, mop nokip kon ke Epaproditom pilke gasa akasinond rina re win nitmikurautondam. Si opimemb re ngirangngirang si gasa pila im, i b'ogiljog si b'angga pila im odede rija na re Ju rigap Godim pilwa

aramkenento yinametind Ti pilwa b'ogil sam okawam.

<sup>19</sup> Si Keriso Yesum pilind ita God ma b'ogil inyomarena kima ukoijog wurar yibim, i kor God opima onggit ukoijog wurar ririrind komresa waina ingaena gasa yindangir tamnikainy dem.

<sup>20</sup> Si b'ogil inyomarena yebim mera B'u Godim pilwa, ngirpu kesa ngirpu kesa, iminjog!

### *Undwatapu Yitkak*

<sup>21</sup> Si kor widaemb yit komresa yina riga wa pilwa yepim re Keriso Yesund yimta yundoki. I Gar ke utkunda nany dide yingganwar yepim re kon kima wekeny, toda kwa wa etmikurauranj widaemb yit.

<sup>22</sup> I kwa komresa yina rigap wa etmikurauranj widaemb yit, aji iminjog jog towa pilkaim yepim re Roma mopyam king Kaisamna metind wiko amnikanj.

<sup>23</sup> Yonggyam Yesu Kerisomna wurar yebim waina wingawinga kima!

**Wipi Yit God ma Yina Sisil Yina Peba  
The New Testament in the Wipi Language of Papua  
New Guinea  
Nupela Testamen long tokples Wipi long Niugini**

Copyright © 2001 The Bible Society of Papua New Guinea

Language: Wipi

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-10-13

---

PDF generated using Haiola and XeLaTeX on 28 Dec 2024 from source files  
dated 31 Aug 2023

a5a5213a-fb12-52b5-9c99-efb8044c6646